



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726-444
fax. +387 33 726-423
e – mail: info@voda.ba

Broj: UP-1/21-1-40-481-4/21

Datum: 01.12.2021. godine

«Agencija za vodno područje rijeke Save» Sarajevo, rješavajući po zahtjevu Općine Zavidovići za donošenje rješenja o prethodnoj vodnoj saglasnosti za aktivnost – izgradnja pješačkog mosta preko rijeke Krivaje u naselju Brezik, MZ Brezik, općina Zavidovići na osnovu člana 109. stav (1) tačka 10. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98 i 48/99), donosi

RJEŠENJE **o prethodnoj vodnoj saglasnosti**

1. Općini Zavidovići daje se prethodna vodna saglasnost za aktivnost – izgradnja mosta preko rijeke Krivaje u naselju Brezik, MZ Brezik, općina Zavidovići a u postupku pribavljanja urbanističke saglasnosti za izgradnju istog.
2. Prethodna vodna saglasnost se daje na osnovu pregleda dostavljene dokumentacije, utvrđenog činjeničnog stanja i pod sljedećim uslovima:
 - 2.1. Da korisnik prethodne vodne saglasnosti osigura izradu tehničke dokumentacije (na nivou Glavnog projekta) na osnovu koje će se vršiti izvođenje radova na izgradnji novog pješačkog mosta preko rijeke Krivaje u naselju Brezik, MZ Brezik, općina Zavidovići. Tehnička dokumentacija treba biti urađena i revidovana od strane pravnih lica koja imaju ovlaštenja (lista «A») pribavljena od strane Federalnog ministarstva poljoprivrede, vodoprivrede i šumarstva i treba da obradi sva pitanja definisana članom 5. stav (2) Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH» broj 31/15, 55/19 i 41/20).
 - 2.2. Sa vodoprivrednog aspekta kota donje ivica konstrukcije mosta, u polju i na osloncima, treba da bude viša za minimalno 80 cm računajući i proračunati uspor u odnosu na kotu velike vode rijeke Krivaje ranga pojave 1/100 godina.
 - 2.3. Obalni upornjaci mosta, u odnosu na prirodni poprečni profil korita rijeke Krivaje trebaju imati takav položaj da ne smanjuju širinu prirodnog korita.
 - 2.4. Sastavni dio investiciono - tehničke dokumentacije za izgradnju mosta treba biti: Elaborat/projekat u kojem će se provesti hidraulički proračun propusne moći projektovanog otvora mosta, odrediti nivo stogodišnje velike vode na lokaciji mosta sa eventualnim usporom, provesti hidraulički proračun za dionicu uzvodno i nizvodno od mosta, utvrditi vučne napone u koritu te za slučaj ako su veći od dozvoljenih u prirodnom koritu odrediti potrebnu dužinu prelaznih dionica od obalnih upornjaka do prirodnog korita sa oblaganjem kosina korita u svrhu zaštite od erozije.
 - 2.5. U projektnoj dokumentaciji dati tehničko rješenje sistema za prikupljanje i ispuštanje oborinskih voda sa konstrukcije mosta u recipijent, definisati mjesto ispuštanja oborinskih voda u recipijent te dati detalj ispusta.
 - 2.6. Projektnom dokumentacijom definisati organizaciju i tehnologiju izvođenja radova na demontaži konstrukcije postojećeg mosta i radova na izgradnji novog mosta preko rijeke Krivaje i radova u obalnom pojasu, te definisati mjere koje je potrebno poduzeti u toku izvođenja radova kako ne bi došlo do erozionih procesa u koritu i obalnom područja rijeke Krivaje, do podlokovanja temelja stubova kao i negativnih uticaja na druge korisnike voda (vodosnabdijevanje, ribari i sl.).
 - 2.7. Predmjerom radova predvidjeti i radove na uklanjanju svih pomoćnih objekata i radove na čišćenju i uređenju korita i obala po završetku izgradnje mosta, uređenju korita rijeke Krivaje u zoni obalnih upornjaka mosta, odvodnja oborinskih voda i dr.

- 2.8. Pri izradi projektne dokumentacije pažnju posvetiti na položaj postojećih instalacija (vodovodne, kanalizacione, elektro, PTT i dr.) te dati tehničko rješenje za ukrštanje ili izmještanje istih.
- 2.9. Projektom dokumentacijom treba, u skladu sa zakonskim propisima, definisati način privremenog pa sve do konačnog zbrinjavanja otpada koji će nastati u toku demontaže konstrukcije postojećeg mosta, izgradnje novog mosta i uređenja vodotoka.
- 2.10. Otpad koji će nastati u toku rušenja stubova i demontaže postojeće konstrukcije mosta kao i u toku izvođenja planiranih radova se ne smije ni privremeno odlagati na česticu «vodno dobro», odnosno unositi u vodotok i na njegove obale.
- 2.11. Pri izradi tehničke dokumentacije pridržavati se pravila struke i nauke te zakonske regulative vezane za ovakvu vrstu radova te ekološko-ekonomskih zahtjeva.
3. Ovu prethodnu vodnu saglasnost će Investitor koristiti u postupku pribavljanja urbanističke saglasnosti i ona definiše sve uslove koje Investiciono-tehnička dokumentacija treba ispuniti za pribavljanje vodne saglasnosti, a sve u skladu sa Zakonom o vodama i provedbenim dokumentima (Pravilnik o sadržaju, obliku, uslovima, načinu izdavanja i čuvanja vodnih akata, Uredba o uslovima ispuštanja otpadnih voda u okoliš i sisteme javne kanalizacije).
4. Po izradi i reviziji investiciono-tehničke dokumentacije, u skladu sa uslovima iz tačke 2. dispozitiva ovog Rješenja, korisnik prethodne vodne saglasnosti dužan je da ovoj Agenciji podnese zahtjev za izdavanje vodne saglasnosti na izrađenu projektnu dokumentaciju.
5. Zahtjev za izdavanje vodne saglasnosti dostavlja se u skladu sa članom 8. i 19. stav (2) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH» broj 31/15, 55/19 i 41/20). Uz zahtjev se prilaže:
 - 5.1. Revidovana Investiciono-tehnička dokumentacija urađena na nivou glavnog projekta i u skladu sa uslovima iz dispozitiva ovog rješenja
 - 5.2. Rješenje o urbanističkoj saglasnosti za izgradnju predmetnog mosta
 - 5.3. Dokaz o izvršenoj uplati upravne takse u iznosu od 60 KM
6. Ova prethodna vodna saglasnost se daje sa rokom važenja od 3 (tri) godine od dana pravosnažnosti rješenja i ista prestaje da važi ukoliko ne bude pribavljena urbanistička saglasnost i ne bude podnesen zahtjev za izdavanje vodne saglasnosti.
7. Ukoliko nakon izdavanja ove prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavjestiti ovu Agenciju, odnosno kantonalno ministarstvo, prije podnošenja zahtjeva, odnosno obavezno navesti okolnosti u zahtjevu za izdavanje vodne saglasnosti.

O b r a z l o ž e n j e

Od strane Općine Zavidovići, u Agenciju je dana 13.10.2021. godine zaprimljen zahtjev za donošenje rješenja o prethodnoj vodnoj saglasnosti za izgradnju mosta istog preko rijeke Krivaje u naselju Brezik, MZ Brezik na parcelama označenim kao k.č. broj: 236/3 i 1762 K.O. Krivaja i k.č. broj: 3755 i 3848/1 K.O. Hajderevići, općina Zavidovići a u postupku pribavljanja urbanističke saglasnosti za izgradnju istog.

U provedenom postupku, uz zahtjev za izdavanje prethodne vodne saglasnosti dostavljena je i pregledana sljedeća dokumentacija:

- Ovjerena kopija Uvjerenja o poreznoj registraciji izdatog dana 23.11.2018. godine od strane Porezne uprave Federacije BiH – Kantonalni porezni ured Zenica,
- Izvod iz posjedovnog lista broj 81 za parcelu označenu kao k.č. broj: 3755 K.O. Hajderevići I posjedovnog lista broj 790 za parcelu označenu kao k.č. broj: 236/3 K.O. Krivaja izdato dana 06.10.2021. godine od strane Službe za upravu geodetskih, imovinsko-pravnih poslova i urbanizma Općina Zavidovići,
- Izvod iz posjedovnog lista broj 82 za parcelu označenu kao k.č. broj: 3848/1 K.O. Hajderevići I posjedovnog lista broj 52 za parcelu označenu kao k.č. broj: 1762 K.O. Krivaja

izdato dana 28.10.2021. godine od strane Službe za upravu geodetskih, imovinsko-pravnih poslova i urbanizma Općina Zavidovići,

- Kopija katastarskog plana za parcelu označenu kao k.č. broj: 3755 K.O. Hajderovići i k.č. broj: 236/3 K.O. Krivaja izdato dana 06.10.2021. godine od strane Službe za upravu geodetskih, imovinsko-pravnih poslova i urbanizma Općina Zavidovići,
- Kopija katastarskog plana za parcelu označenu kao k.č. broj: 3848/1 K.O. Hajderovići i k.č. broj: 1762 K.O. Krivaja izdato dana 28.10.2021. godine od strane Službe za upravu geodetskih, imovinsko-pravnih poslova i urbanizma Općina Zavidovići,
- Studija za PVS za izgradnju pješačkog žičanog mosta na rijeci Krivaji u naselju Brezik, općina Zavidovići urađenom od strane «ES HYDROTECHNICS» d.o.o. Sarajevo, novembar 2020. god.,
- Dokaz o uplaćenju upravnoj i administrativnoj taksi na zahtjev.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 124. stav (1) Zakona o vodama i članom 21. stav (3) Pravilnika o sadržaju, obliku, uslovima, načinu izdavanja i čuvanja vodnih akata o predmetnom zahtjevu je dana 25.10.2021. godine obavještena javnost putem obavještenja na oglasnim pločama «Agencije za vodno područje rijeke Save» u Sarajevu i Zenici, te dana 26.10.2021. godine u dnevnom glasilu «OSLOBOĐENJE». U datim rokovima nije bilo pisanih izjašnjenja o predloženim aktivnostima iz zahtjeva.

Na osnovu uvida u dostavljenu dokumentaciju utvrđeno je:

Izgradnja novog pješačkog žičanog mosta preko rijeke Krivaje u naselju Brezik, MZ Brezik planirana je na lokalitetu postojećeg mosta (u situacionom pogledu, u potpunosti je zadržan postojeći položaj mosta). U okviru planiranih aktivnosti, nakon uklanjanja ostataka temelja starog mosta gradit će se most ukupne dužine 71,25m sa dva pilona visine 14,0m i tri polja raspona (14,85+45,00+11,40). Predviđena širina drvene kolovozne konstrukcije mosta je 2,0m.

Uvidom u dostavljenu Studiju urađenu od strane «ES HYDROTECHNICS» d.o.o. Sarajevo, novembar 2020. godine, utvrđeno je da je za novi pješački most u naselju Brezik, u visinskom pogledu niveleta mosta prevashodno određena na osnovu hidrauličkog proračuna otvora mosta kojim je za max proticaj povratnog perioda 1/100 utvrđena kota velike vode rijeke Krivaje na lokaciji mosta od $H_{1/100}=226,21$ m.n.m. odnosno kota donje ivice konstrukcije mosta (227,26 m.n.m.) je na visini od 1,05m iznad kote velike vode povratnog perioda 1/100.

Hidrauličkom analizom utvrđeno je da ne postoji negativan uticaj mosta na okolno područje.

Na osnovu utvrđenog činjeničnog stanja i dostavljene dokumentacije, a u svrhu smanjenja negativnih uticaja predmetne aktivnosti na stanje voda i prava na vode dodijeljena drugim korisnicima, kao i onemogućavanja degradacije kvaliteta voda, podnosiocu zahtjeva su ovim vodnim aktom, u tački 2. dispozitiva rješenja, shodno odredbama Zakona o vodama, Pravilnika o sadržaju, obliku, uslovima i načinu izdavanja i čuvanja vodnih akata i Uredbe o uslovima ispuštanja otpadnih voda u okoliš i sisteme javne kanalizacije propisani uslovi koje je Investitor dužan ispuniti prilikom izrade projektne dokumentacije koja se dostavlja uz zahtjev za izdavanje vodne saglasnosti.

Na osnovu prednjeg i provedenog postupka, a shodno odredbama člana 111. Zakona o vodama i člana 5. Pravilnika o sadržaju, obliku, uslovima, načinu izdavanja i čuvanja vodnih akata, doneseno je rješenje kao u dispozitivu.


Podnosilac zahtjeva je uplatio upravnu i administrativnu taksu u iznosu od 80 plus 3 KM u skladu sa Zakonom o federalnim upravnim taksama i tarifi federalnih upravnih taksi («Službene novine Federacije BiH», broj 6/98, 8/00, 45/10 i 43/13).

UPUTA O PRAVNOM LIJEKU:

Protiv ovog Rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema Rješenja. Žalba se podnosi neposredno pismeno, usmeno na zapisnik ili preporučeno putem pošte ovom organu i taksira se sa 15 KM administrativne takse prema tarifnom broju 3. Tarife federalnih administrativnih taksi.

Obrađivač akta:
Nermina Hodžić, dipl.ing.građ.

Po ovlaštenju
Rukovodilac sektora za izdavanje vodnih akata


Haris Ališehović, dipl.ing.građ.

Dostaviti:

- Općina Zavidovići
ul. Safvet bega Bašagića bb, 72220 Zavidovići
- ④ AVP Sava, ISV-vodna knjiga
- Sektor 40 - arhiva;
- Oglasna ploča - AVP Sava